

«25» դեկտեմբերի 2023թ.

ք. Երևան

Հայաստանի Հանրապետության պետական եկամուտների կոմիտեի Երևանի մաքսային սպասարկման կենտրոն-մաքսատուն, վարչության պետի տեղակալ Աղասի Աղայանս, ուսումնասիրելով «Մուլտի Տաբակ» ՍՊ ընկերության (<ՎՀՀ՝ 02694388, հասցեն՝ ՀՀ, ք. Երևան, Արգիշտի փող. 9, տնօրեն Էդուարդ Արտակի Կարապետյան) կողմից «Ներքին սպառման համար բացթողում» մաքսային ընթացակարգով թիվ 05100010/301023/0109313 ապրանքների հայտարարագրով հայտարարագրված ապրանքների մաքսային ձևակերպման փաստաթղթերը,

Պ Ա Ր Զ Ե Ց Ի

«Մուլտի Տաբակ» ՍՊ ընկերության կողմից թիվ 05100010/301023/0109313 ապրանքների հայտարարագրով «Ներքին սպառման համար բացթողում» մաքսային ընթացակարգով հայտարարագրվել են ապրանքներ՝ ներմուծման մաքսատուրքերի վճարումը 1 ամիս ժամկետով հետաձգելու պայմանով, որոնց համար առաջադրված մաքսային վճարների վճարումը ընկերության կողմից սահմանված ժամկետում չի կատարվել:

ՀՀ ՊԵԿ Երևանի մաքսային սպասարկման կենտրոն-մաքսատուն, վարչության ՓՀ և ԳՀ բաժնի կողմից 11.12.2023 թվականին տրված տեղեկանքի համաձայն՝ «Մուլտի Տաբակ» ՍՊ ընկերության կողմից մաքսային վճարների գծով բռնագանձման ենթակա գումարը կազմում է ընդհանուր 100,912,763 ՀՀ դրամ, որից ապառք՝ 100,510,720 ՀՀ դրամ, տույժ՝ 402,043 ՀՀ դրամ:

Նշված փաստի առթիվ ՀՀ ՊԵԿ Երևանի մաքսային սպասարկման կենտրոն-մաքսատուն, վարչությունում հարուցվել է վարչական վարույթ «Մուլտի Տաբակ» ՍՊ ընկերության կողմից վճարման ենթակա մաքսային վճարների գանձման նպատակով, ինչի առթիվ 2023 թվականի դեկտեմբերի 25-ին ժամը 11:15-ին հրավիրվել են լուսններ, որի մասին պատշաճ կարգով ընկերության տնօրենը ծանուցվել է, սակայն չի ապահովել ընկերության ներկայացուցչի մասնակցությունը հրավիրված լսմանը, ինչպես նաև գրավոր որևէ բացատրություն կամ դիրքորոշում չի ներկայացրել:

ՀՀ Սահմանադրության 60-րդ հոդվածի 8-րդ մասը սահմանում է, որ յուրաքանչյուր ոք պարտավոր է մուծել օրենքին համապատասխան սահմանված հարկեր, տուրքեր, կատարել պետական կամ համայնքային բյուջե մուտքագրվող պարտադիր այլ վճարումներ:

ՀՀ հարկային օրենսգրքի 401-րդ հոդվածի 1-ին մասի համաձայն՝ հարկի վճարումը սահմանված ժամկետներից ուշացնելու դեպքում ժամկետանց յուրաքանչյուր օրվա համար հարկ վճարողը կամ հարկային գործակալը վճարում է տույժ՝ 0.04 տոկոսի չափով:

Նույն հոդվածի 2-րդ մասի համաձայն՝ նույն հոդվածի 1-ին մասով սահմանված տույժը կիրառվում է ժամանակին չմուծված հարկի գումարի (այդ թվում՝ հարկային հարաբերությունները կարգավորող իրավական ակտերով սահմանված դեպքերում՝ հարկային գործակալի կողմից չվճարված), հարկերի կանխավճարային գումարների, հարկային հսկողության արդյունքներով հայտնաբերված (պակաս ցույց տրված)

հարկի գումարի նկատմամբ՝ դրանց վճարման ժամկետից անցած ամբողջ ժամանակաշրջանի համար, բայց ոչ ավելի, քան 730 օրվա համար:

ԵԱՏՄ մաքսային օրենսգրքի (այսուհետ՝ Օրենսգրք) 59-րդ հոդվածի 1-ին մասի համաձայն՝ Օրենսգրքի 60-րդ հոդվածին համապատասխան ներմուծման մաքսատուրքերի վճարումը հետաձգելու համար տոկոսներ վճարելու պայմանով ներմուծման մաքսատուրքերի վճարումը հետաձգելու հնարավորություն տրամադրվում է ապրանքները «ներքին սպառման համար բացթողում» մաքսային ընթացակարգին համապատասխան բաց թողնելու օրվան հաջորդող օրվանից ոչ ավելի, քան 1 ամիս ժամկետով:

Օրենսգրքի 60-րդ հոդվածի 1-ին կետի համաձայն՝ 59-րդ հոդվածի 1-ին և 3-րդ կետերին համապատասխան ներմուծման մաքսատուրքերի վճարումը հետաձգելու կամ տարաժամկետ կատարելու հնարավորությունից օգտվելու յուրաքանչյուր օրվա համար, սկսած «ներքին սպառման համար բացթողում» մաքսային ընթացակարգին համապատասխան ապրանքները բաց թողնելու օրվան հաջորդող օրվանից մինչև ներմուծման մաքսատուրքերը վճարելու պարտավորությունը դադարելու օրը, վճարման ենթակա են տոկոսներ:

Օրենսգրքի 60-րդ հոդվածի 3-րդ կետի համաձայն՝ ներմուծման մաքսատուրքերի վճարումը հետաձգելու կամ տարաժամկետ կատարելու համար տոկոսները ենթակա են վճարման՝ ներմուծման մաքսատուրքերը վճարելու կամ բռնագանձելու օրվան հաջորդող օրվանից ոչ ուշ:

«Մաքսային կարգավորման մասին» ՀՀ օրենքի 114-րդ հոդվածի 1-ին մասի համաձայն՝ մաքսատուրքի, հարկերի՝ դրանց գծով տույժերի, տոկոսների վճարման պարտավորությունը սույն օրենքով սահմանված կարգով և ժամկետում չկատարելու դեպքում դրանց բռնագանձումը մաքսային մարմինների կողմից իրականացվում է օրենքով սահմանված կարգով՝ մաքսատուրք, հարկեր վճարողի միջոցների կամ այն ապրանքների արժեքի հաշվին, որոնց համար մաքսատուրքերը, հարկերը չեն վճարվել:

ՀՀ ՊԵԿ Երևանի մաքսային սպասարկման կենտրոն-մաքսատուն, վարչության ՓՀ և ԳՀ բաժնի կողմից 25.12.2023 թվականին տրված տեղեկանքի համաձայն՝ «Մուլտի Տաբակ» ՍՊ ընկերության կողմից 13.12.2023թ. դրությամբ կատարվել է մասնակի վճարում, մաքսային վճարների ծով բռնագանձման ենթակա գումարը կազմում է ընդհանուր 75,494,011 ՀՀ դրամ, որից ապառք՝ 74,653,224 ՀՀ դրամ, տույժ՝ 840,787 ՀՀ դրամ:

Հիմքում ունենալով վերոգրյալ իրավակարգավորումների ամբողջությունը, հիմք ընդունելով թիվ 05100010/301023/0109313 ապրանքների հայտարարագիրը և ՀՀ ՊԵԿ Երևանի մաքսային սպասարկման կենտրոն-մաքսատուն, վարչության ՓՀ և ԳՀ բաժնի կողմից տրված տեղեկանքը՝ գտնում են, որ «Մուլտի Տաբակ» ՍՊ ընկերության կողմից չվճարված մաքսային վճարների գումարը սահմանված ժամկետում չվճարելու հիմքով ենթակա է գանձման:

Ելնելով վերոգրյալից և ղեկավարվելով ՀՀ Սահմանադրությամբ, ՀՀ հարկային օրենսգրքով, «Մաքսային կարգավորման մասին» ՀՀ օրենքով և «Վարչարարության հիմունքների և վարչական վարույթի մասին» ՀՀ օրենքի 7-րդ գլխի դրույթներով՝

Ո Ր Ո Շ Ե Ց Ի

1. «Մուլտի Տաբակ» ՍՊ ընկերությունից հոգուտ պետական բյուջեի բռնագանձել **75,494,011 (յոթանասունհինգ միլիոն չորս հարյուր իննսունչորս հազար**


տասնմեկ) ՀՀ դրամ ԱԱՀ-ի գումար, որից ԱԱՀ-ի ապառք՝ 74,653,224 ՀՀ դրամ, տույժ՝ 840,787 ՀՀ դրամ:

2. Որոշման մասին օրենքով սահմանված կարգով իրազեկել «Մուլտի Տաբակ» ՍՊ ընկերությանը:
3. Որոշմամբ նշանակված գումարի վճարման հաշվեհամարն է 900005010120-ը (ՀՀ պետական բյուջե, կենտրոնական գանձապետարան, Երևանի մաքսային սպասարկման կենտրոն-մաքսատուն, վարչություն, ԿՈԴ 27):

Սույն որոշումն ուժի մեջ է մտնում դրա ընդունման մասին իրազեկելուն հաջորդող օրը և «Վարչարարության հիմունքների և վարչական վարույթի մասին» ՀՀ օրենքի 10-րդ գլխի նորմերին համապատասխան կարող է երկամսյա ժամկետում բողոքարկվել վերադասության կարգով կամ ՀՀ վարչական դատավարության օրենսգրքով սահմանված կարգով՝ վարչական դատարան:

Սույն որոշումը կամավոր չկատարվելու դեպքում այն կկատարվի «Դատական ակտերի հարկադիր կատարման ծառայության» միջոցով՝ պարտապանի հաշվին:

**ԵՐԵՎԱՆԻ ՄԱՔՍԱՅԻՆ ՍՊԱՍԱՐԿՄԱՆ
ԵՆՏՐՈՆ-ՄԱՔՍԱՏՈՒՆ, ՎԱՐՉՈՒԹՅԱՆ
ՊԵՏԻ ՏԵՂԱԿԱԼ**



ԱՂԱՍԻ ԱՂԱՅԱՆ